

Luther, Martin

Ayn Sermon von der zerstörung Jerusalem Das teütschland auch also zerstört  
werd, wa es die zeyt seiner haymsuchung nicht erkent ; Was der tempel  
Gottes sey

[Augsburg] 1525

Res/4 Th.u. 103,XXIX,8

urn:nbn:de:bvb:12-bsb00088041-0

VD16 L 6576



\*\*\*\*\*  
\* Res. 4 \*  
\* Th. U. \*  
\* 103 \*  
\* XXIX, 8 \*  
\*\*\*\*\*



Th. II. 103 (Vol. XIX, X. '8

4<sup>d</sup>

Luther


= Weller 3528

WLA 15, 739 C


[Augsburg: H. Steiner]

new











Aln Sermion von der zerstörung Je-  
rusalem. Das teütschland auch also zerstört  
werd/wa es die zeyt seiner haym-  
süchung nicht erkent.

Was der tempel Gottes sey

Aln Sermion von des Jüdischen ri-  
renchs vñ der welt end Dat.  
thet. xxiiij.

Martinus Luter.

M D XXV





Ein sermon an dem zehenden Sonntag  
nach der hayligen dreysaltigkayt.

Euangelium Luce am. xix Cap.

**U**nd als er nach hin zu kam / sahe er  
die stat an / vnd waynet über sie vñ sprach /  
Wañ du wistest / was zu deinem fryd die-  
net / so wurddest du es ann deynem heüttigem tag be-  
dencken / aber nun ist's vor deinen augen verborgen /  
Dann es würt die zeyt über dich kommen / das deine  
feynd werden vmb dich vñ vñ deine kinder mit dir /  
ain wagenburg schlagen / dich belegeren / vnd an al-  
len orten ängsten vnd schlayssen / vñ werden kaynen  
stein auff dem andern lassen / darumb / das du nicht  
erkennt hast die zeyt daryn du haymgesucht byst.

Vnnder gieng in den tempel / vnd sieng an auß zu-  
treiben die darynnen verkaufften vnd kaufften / vnd  
sprach zu inn. Es stat geschryben. Mein hauf ist ain  
Betthaus / jr aber habts gemacht zu mörder grüben.  
Vnd leret täglich im tempel. Aber die hohen priester  
vnd geschryfftgelerten vnd die fürnemsten im volck  
trachten im nach / das sie in vmbrechtten / vnd funden  
nicht wie sie im thun solten / dan das volck hieng im  
an / vñnd höret inn.





**I**n Euangelium ist auff dem  
Palntag geschehen/da der Herz einrytt gen  
Jerusalem / da hat er in dem tempel zwen od  
drey tag geprediget/wellichs er vornye getho

Die summa vnnnd der innhalt dyß Euan-  
gelij ist/das er sich bekümmert vnnnd beklagt den iomer deren/die  
das wort Gottes verachten.

Ir habt nu oft gehört wz dz wort Gotes sey/wz es mit sich  
bring/ vnd was es für schüler hab/daruon hie nichts gesagt  
würt/allayn würt angezaygt die peen vnnnd der iomer/der  
über die Juden geen solt/von wegen/dz sie die zeit irer haim-  
süchung nicht erkant haben. Vnd laßt vns eben darauff se-  
hen/dan es gilt vns auch/Werden die gestrafft die nicht er-  
kennen das sie seynd haimgesücht/was würt denen gesche-  
hen/die es verfolgen/lestern vnnnd schenden? wie wol er hie  
sagt allayn von denen/die es nicht erkennen.

Es seynd zwaiерlay weyß zu predigen wider die verachter  
des wort Gottes. Zum ersten mit tröwen/wie inn Christus  
tröwet Mathei.xi. Wee dir Chorazin/wee dir Bethsaida/  
weren solche thadten zu Tyro vnd Sidon geschehen/als bey  
euch geschehen seynd/sie hetten vorzeyten im sack vnd in der  
äsch en büßthon ic. Vnd du Capernaum (weliche seyn stadt  
was da er am maysten wunder thät) die du bist erhaben byß  
an den hymel/du würest biß inn die hell hinnunder gestossen  
werden/Ich sag euch/es würt der Sodom er land baß ergen  
am iungsten gericht/dann dir ic. Dyß seind tröwort da mit  
er sie erschreckt/das sie das wort we'chs inn got schickt/nicht  
also in wind schlagen.

Die ander weyß/da er hie waynt vñ erbarmt sich über sie/  
schilt vnd tröwet in nicht als den verstockten vnnnd verblent-  
ten/sonder verschmilzt in der liebe/vnnnd erbarmt sich über  
seyne feind/wolt sie gern abwenden/aber es ist verlorn. Mat  
thei am.xi.da er sie schilt/handelt er nicht auß der liebe/son-

a ij der auß



der auß strenge des glaubens/hie aber ist lautter feur vnnd barmhertzigkayt.

Zum ersten / als er der Stadt zunahet / giengen sie im vor vnnd nach / sungen mit grossen freuden / vnd sprachen / Hosianna dem sun David / legten Elayder auff den weg har eten zweig von den bömen / ströweten sie auff den weg / vnd gieng gang herlich zu / Mitten in der freud hebt er an vnnd waynt / laßt alle welt frölich sein / im aber giengē die augenüber / da er die Stadt sahe / vnd sprach / O wistest du was zu deinem fryd dienete / das du nicht zerstört / sonder steen blybest / du wurddest es noch heüt bedencken / vnd dich dareyn schicken / yezund wer es zeyt / das du deyn bests erkantest / aber du bist blind / vnd würst die zeyt versäumen / so würdt dann weder hülff noch radt da seyn / als wolt er sagen / Wie stast du wol gebawen / vnd seynd gewaltigleüt inn dir / die seynd sicher vnd frölich vermainen es hab Eayn not / aber noch in vierzig jaren wirt es auß seyn mit dir.

Die Juden aber stünden stey ff / verliessen sich auff die zusagung Gottes / das sie nicht anders maynten / dann sie solten ewiglich bleyben / sie waren sicher / vnnd vermaynten / Gott thut sollichs nicht / wir haben den tempel / hye wonet Gott selbs / so haben wir treffenlich leüt / gelt vnd güt genüg / trug wer vns thut. Es haben auch die Römer vnnd der Kayser / nach dem er die Stadt gewan / selbs bekant / die stat sey so wol erbawt vnd so vest gewesen / das es vnmüglich wer sie zu gewinnen / wa es nicht Got sonderlich gewelt het. Darumb stünden sie auff irem aignen rhüm / sagten ir zuuersicht auff falschen won / das hat sie auch betrogen.

Der Herr aber sach tieffer / da er sagt / O Stadt / wistest du was ich wiß / du wurddest nach deinem frid trachten (Fryd hayst in der schrifft / wann es ainem wol gadt) du maynst / du habest güt tag / wistest du aber wie dich deyne feind umblegeren / ängsten vnd treyben / an allen orten schlayffen / alle heüser einreyssen wurden ic. du wurddest das wort wol annehmen / welchs dir brecht rechten fryd vnd alles güte.

wer die hi-



Wer die histori list/der würt das Euangelium wol ver-  
ston. Got hat es eben geschickt / das die stadt belegert ward  
auff die österliche zeyt / darynn die Juden auß allen landen  
gen Jerusalem zusamen kamen / vnd seind bey ainander ge-  
wesen (als Josephus schreybt) dreyssig mal hundert tausent  
man / Das ist ain greulich groß volck / es wer genüg wann ir  
hundert tausent weren / die hat Got zusamen bachen / in ain  
hauffen schmelzen vnd schmiden wollen. Die Aposteln vnd  
Chrysten waren all herauß / wolten sich nicht lassen finden in  
disem volck / zohen in Herodis land / nicht weyt von Jerusa-  
lem / Got hat das Korn herauß genomen / vnd die spreuwer  
auff ayn hauffen geschüdt. Das was aber ayn sollich groß  
volck / das sie ain künigreich solten außgessen haben / ich will  
geschweygen ain stadt / Sie kamen auch in sollichen iomer /  
da sie alles verzereten vnd nicht mer hatten / das sie die senen  
von den armbrosten vnd die schüchlappen von den schühen  
müsten essen / sie müsten vor grossem hunger ir aygne kinder  
schlachten / namen den weybern die gekochten kinder / rochen  
den braten über zwü gassen / tauben dreck brauchten sie für  
saltz / vnd der galt vil gelt / dan es was ain solcher iomer vnd  
solch blüt vergiessen / das es ain stayn möcht erbarmt habē /  
weres gesehen het / der hette gemaynt / Gott künd nicht so  
grewlich zürnen vnd ain volck so jämmerlich martern / Es la-  
gen die heüser vnd die gassen voll todten / die hungers halb  
gestorben / waren / Noch waren die Juden so toll / trugte auf  
Got / vnd wolten sich nicht ergebē / byß sie den Kayser erzürn-  
ten / das er darnach dreyssig Juden vmb ain pfenning gab /  
Da aber der Juden etlich so schalckhafftig waren vnd fra-  
sen das gelt / dz man es nicht neme / namē sie die Arabier vñ  
Syrier vñ schnidten zway tausenten die beüch auff vnd such-  
ten gelt bey in / Es ist auch noch heüt des tags das verachtest  
volck auff erden / allenthalb seynd sie zerstrewt / vnd künden  
nicht zusamen.

Also hat Got den tod Christi vnd aller propheten geroch-  
en / also ist in vergoltē / das sie nicht erkant haben die zeyt der  
haymsuchung.

a iii auff das



## Auff das teütsch land gedeit.

Hie laßt vns lernen/dan es gilt vns nicht/die wir hie seind  
allayn /sonder dem gangē teütschē land /Es ist kayn scherz/  
wir dürffen auch nicht in synnemen/das es vns anders gen  
werd /Die Juden wolten es auch nicht glauben biß sie es er  
füren vnd innen wurden. Wir werden iez auch also haymge  
sücht von Got /Er hat vns ain schatz auff gethon /seyn hayli  
es Euangelium /dardurch wir seyn willen erkennen/vnd se  
hen wie wir in des teüfels gewalt stecken /aber niemann will  
es annemen /ja wir verachtens wol darzu /vnd das noch größ  
er ist /wir verfolgens vnd schmähens /Got ist gedultig /sicht  
vns ain weyl zu /Der sehen wirs aber ain mal /dß er das wort  
wider auff wirt heben /so wirt eben der zorn v̄ über die Jude /  
über vns auch gon /Dan es ist gleych ain wort /eben der selbig  
Got /ainerlay Christus /wie es die Juden gehabt habē /Dar  
umb würt gewislich die straff an leyb vnd ann seel auch ge  
leych seyn. Wir haben es wol für ain spot /niemann thut dar  
zu /das ist dann ain groß zaychenn der blindhayt /wir solten  
greysen /das vns Gott verstockt /dann kayn stat nymbt sich  
des an /kayn Fürst stelt sich als sey im ernst /Es ist ain iomer  
lich ding /es wirt hyndennach darzu kōmen /das teütschland  
auff ainem hauffen würt ligen. Es hat sich auch wol ange  
hebt mit den bauren /wir haben ain groß volck verlorn /hun  
dert tausent man zwyschen Ostern vnd Pfingsten /es ist ain  
groß werck Gottes /hab sorg /es werd nicht darbey bleyben /  
das würt nur ain vorlauff vnd ain trōwung seyn /dar mit er  
vns will abschrecken /das wir vns fürsehen /es ist nicht mer  
dan ain fuchßschwanz /kōmt er mit der beytschen hernach /  
so würt er gar redlich dareyn schmeysen / Wir werden aber  
eben thūn wie die Juden /werden es nicht achten /biß vns we  
der züraden noch zū helfen würt.

Jetzt möcht wirs fürkōmen /yetzund wers zeyt das wir vn  
ser bests erkanten /vnd das Euangelium mit friden annemē /  
dann yetzund würt vns die gnad fürgetragen /dardurch wir  
möchten



möchten frydsam seyn / aber wir lassen ain tag nach dem andern / ain jar nach dem andern hingehn / thünd doch weniger darzü dann vor / Würdt die zeyt auß seyn / so hylfft Eayn bitter mer / Wir nemen es nicht zü hergenn / maynen wir seyen sicher / vñnd sehen nicht den grossen iomer / der schon ergangen ist / sehen nicht das vnns Gott so jämmerlich strafft mit den falschen propheten vñnd secten die er vns allen halben schickt / welliche so sicher predigē / als haben sie den hayligen gayst gar gefressen Die wir für die allerbesten gehalten haben / die saren zü / vñnd machen die leüt irr / das sie schier nicht wissen was sie thon oder lassen sollen. Das ist aber erst ain anheben / wie wol schrecklich vñnd greulich genüg / daß es ist Eayn grösser hertzlayd vñnd iomer / dann wann vns Got secten vñnd falsch gayster schickt / die weyl sie so frech seynd / vñnd wagens so kün / das es zü erbarmen ist / Herwiderumb / ist das wort Gottes so ain grosser schatz / das es niemant genügsam begreyffen kan / Got achtet seyn schatz mechtig groß / vñnd wann er vns haymsücht mit gnaden / wolt er gern / das wirs lieblich vñnd frey von vns selbs annehmen / will vns nicht darzü zwingen / wie er wol möcht / sonder will dz wir mit lust von vns selbs gern volgen / wie wol er nicht haret biß wir komen / sonder komet vns vor / komet in die welt / würt mensch / dient vns / stirbt für vns / steet widerumb auff / schickt vns den hayligen gayst / gibt vns seyn wort wider / thüt den hymel so weyt auff das es alles offen steet / gibt vns darzü reiche verhayssung vñnd zülagung / das er vns wöll versorgen zeytlich vñnd ewiglich / hie vñnd dort / schüt sein gnad gang vñnd gar auß / Darumb ist die zeyt der gnaden jetz hie / wir aber verachtens / vñnd schlagens in winnd / das würt vñnd kan er vns nicht schencken.

Das wir jm aber sein wort also verachten / da gehört straff zü / würt vnns auch straffen / vñnd solt es hundert jar anstehen / solang aber würt es nicht anston / vñnd je heller das wort ist / je grösser die straff würt seyn. Ich fürcht es werd das gang teütschland kosen / Gott wöll das ich ain falscher prophet sey in der sach. / Es würt aber gang gewyß geschehen / Gott kan die büberey



die büberey vngerochen nicht lassen/er wirt auch nicht lang  
zusehen/dann das Euangelium ist so reich geprediget/das  
es so klar nicht ist gewesen zu der Apostel zeyt/Darumb wirt  
es Teütschland gelten/das sorg ich/es muß in grund gönn.

Wir/die das Euangelium lang gehört habē/solten Got  
freüntlich bitten/das er wölt lenger frid geben/Die Fürste  
wollen es all ain mit dem schwert hinauß führen/greyffen got  
zu frech in den bart/der würt sie auch auff das maulschlahē.  
Darumb wer es hohe zeyt/das wir Got mit ernst bäten da-  
mit das Euangelium weytter möchte kōmen in Teütschland  
zu denen/die es noch nicht gehört haben/dann wa die straff  
so bald über vus kē/so ist schon auß/so bleyben dan vil see-  
len dahynden/ee das wort zu in kōmpt.Darumb wolt ich/dz  
wir es nicht verachtent/nicht all ain von vnser/sonder auch  
deren wegen/die es noch sollen hören. Es ist ain wenig still  
worden/Wor wöll das es also bleyb/vñ das die Fürsten nicht  
töller werden/dann solt es widerumb anfahren/ist zu besor-  
gen/es wird kayn end haben.

Wir thünd gleych wie die Juden/die hattē mer acht des  
bauchs/dann Gottes/haben sich mer geflissen/wie sie denn  
bauch füllen/dann wie sie solten selig werden/Darumb ha-  
ben sie die bayde verlorn/vnd ist ihn recht geschehen/die weyl  
sie das leben nicht wolten annemen/hat inn Got den bauch  
darzu genomen/das si nun leyb vnd seel verlorn haben. Sie  
haben auch gleych die vrsach fürgewendt/die jergund die vn-  
sern/Wir wölten das Euangelium wol gern annemen/wa  
nicht dar auff stünd gefärlichayt leybs vnd des güts/wa es  
nicht kostet weyb vñ kinder/dan wa wir an in glauben (spra-  
chen sie)so kōmen die Römer/vnd nemen vnß land vñ leüt/  
wie dann nicht destminder geschehen ist/dann was der got-  
loß fürcht/das würt in zu tayl/Diß hat die Juden verhyn-  
dert/das sie Got nicht glauben wolten/vnd haben nicht an-  
gesehē die grossen reychen zusagungē die in Got gethon hat/  
da er sagt/Ich will dirshundertfeltig wider geben/hievnd  
dort das ewig leben/laß weyb vnd kind farenn/ich wilß wol  
erhalten/



erhalte / ich wil dir wider gebē / wags nur frisch auff mich /  
Wainst ich künd dir nicht ain and hausbawen: Hastu mich  
so für ain schlechten man / vnnnd ich will dir den hymel geben:  
Wiltu es nicht auff mich wagen: Wirt dir das güt genomē  
wol dir / himel vnnnd erd ist mein / ich wil dich freylich wol be-  
zalen. Über dise vnd der gleichen vil sprüch geen wir fürüber /  
wir verachtens darzü / sehen nur was wir im kassen habenn /  
vnd wie vns die tāschen voll werd / vñ sehen nit das vns Got  
dis auch / das wir habē / geben hat / vnd würd vns noch meer  
darzü geben / sehen auch nit / wān wir Got verlieren / das der  
bauch auch hinweg muß / Darumb geschicht vns eben recht /  
das wirs bayde verlieren / Got / vnd die creatur darzü.

Die aber Got glauben die wagent es auff Got / vnd setzen  
alls dahin / in Gottes gewalt / das er es mach nach seinem ge-  
fallen / vnnnd dencken also / Got hat dir dein hauß vnnnd dein  
haußfrawen gebē / du hast selb nit gezeügt / dieweil es nun  
Gottes ist / so wil ichs auff in wagen / er wirts wol erhalten /  
Ich müßt es doch sonst lassen / darumb wil ich es frisch auff  
in wagen vnd verlassen von seintwegen was ich hab / Wil er  
mich hie haben / so wirt er mir wol ain anders geben / dān er  
hat verhaissen genüg zū geben hie vnd dort ewiglich / Wil er  
mich nit hie habenn / so bin ich im ain tod schuldig / wann er  
mich fordert / so wag ichs von des worts wegen.

Wer nit also thut / der verlaugnet Got / vnd müs gleich wol  
verlieren bayde zeitlichs vñ ewigs leben. Der stinckend bauch  
der vnser Gott ist / macht das wir dem wort Gottes nit an-  
hängen / ich wil vor gewis sein / wie ich mich ernere / vnnnd wa  
mein güt sey. Das Euangelium spricht / Vertrau Got / so wil  
ich den bauch gewis versorgt haben / vnd wān ich nur .x. gul-  
din hab / so machen sie mir ain müc / dz ich denck / ich hab drey  
zehnen tag zū essen / verlaß mich auff mein vorrat / vnd vtraw  
Got nit / der mich bißher ernert hat / dzer mich morgen auch  
versorgen werd / Ist dz nit ain schentliche plag / das ich mich  
nur auff ainen groschen verlas / ich hab morgen zū essen Pfeü  
dich des schenlichen bauchs. Sol ain grosch bey mir mer gel-  
b ten vnd



ten/vñ auch ain grössern müt machen/dañ Got selbs/der himel vnd erd vnder im hat/der vns lufft vnd wasser gibt/laßt vns das korn wachsen/vñ gibt vns alle ding/Ls ist so schentlich das es nit zū sagen ist/das Got nit so vil bey vns geltenn sol/als hundert guldin: Warumb denckstunitt/Der Gott/der mich erschaffen hatt/wirt mich wol erneren/will er mich lebendig haben/Wil er nit/ey/so sol ich nichts haben?

Ja/sagt der bauch/ich find kein Got in meinem kassen. Du doller esel/wer macht dich gewis/das du morgen leben wirst? Du bist nit gewis/ob du den bauch morgen habest/vnd wilt wissen wa das fütter vnd die speys sey/Ly wie sein bistu gewis: Wā vns das zū hergengienng/so sehen wir/wie ain hellich regimennt auff der welt wer/ja das es der teuffel selber wer. Ist es nit aingreulich dinng/das Gott der so vil meüer speysst/nit so vil geltenn sol bey mir/das ich im traw/er werd mich erneren/ja das ain guldin meer sol geltenn dann Gott/der seine güter so reichlich außschütt/die welt ist vol Got vñ Gottes werck/er ist allenthalben mit seinen gütern/noch wollen wir vns nit auff in verlassen/oder seyn haimsuchung annemen/Pfeüdich der verfluchten welt/was ist sie für ain kind/das sie Gott nicht ain tag kan vertrauen/vnd vertrauet doch ain guldin.

Nun sehen wir/main ich/was die welt sey/wie sie Got veracht/von des bauchs wegen/vñnd muß doch den bauch mit leib vnd seel verlieren/O wie sein wir so haillos leüt/wir solten die welt verspeyen/wā ainer gedächt/das er so ain haillos tropffwer/das er Got nitt also trawen künde/der solt im nit wünschen zū leben/Nur hin gewürgt/dañ wir stecken zū tieff in dem alten Adam gefangen/die welt ist die vorhell/ja ain recht teuffels reich/vnd ain vorhoff in die hell/der leib ist noch da/sonst ist es die recht hell mit ainander.

Vñ des wegē manet vns Christus mit wainēdē augē/dz wir vnser hail erkēnē/vñ sein haimsuchung anemē/auff dz nit auch die plag folg/die gewis kōmen wirt über die so es nit anemē/die da sicher seind/biß si dz gäch vderbē überfallē wirt.  
von dem



## Von dem Tempel Gottes.

Das ander stuck des Euangelij ist / das er in den tēpel geet / vnd sieng an auß zū treiben / die darinnen kauftten vnd verkaufften etc. Das erst stuck ist nichts anders gewesen / dan ain ermanung vnd raizung zū dem glauben / hie zaigt vns der H<sup>er</sup> X<sup>rist</sup> an / was der tempel Gottes sey / vnd fūrt die sprūch ein / auß der schrift Esaie .56. Mein haūß ist ain betthaūß allen Haidē / ir aber habt es zū ainem kauftthaūß gemacht. Hie ist ain starcker spruch / das der prophet spricht / Allen Haidē wider die Juden / die sich auff den tempel Gottes zū Jerusalem verließen / vñ maintē / dises mütterlich haūß wūrd ewig steen bleiben / maintē es wer vnmüglich / das Got disen tempel brechen oder die statt zerstört wurd / das wort Gottes lūge nit / vnd darumb haben sie auch Stephanum gemartert / dz er wider die hayligen stōt redt / vnd sagt Ihesus wurd dysē statt zerstören / vñ die sitten endern / die in Moses geben het Da sprachē sie / haben doch die propheten diß haus gebreißt vnd Christus hie selbs sagt / es sey ain betthaūß / vnd ir Apostel sagt / er werde zerstören. Also aber muß man disen spruch verstē / das die statt / der tempel vnd das volck / solt bleyben biß auff Christuszeit / darauff giengen all propheten / die haben es Christo alls in die hend geben / wie er es dan machet / also solt es seyn vñ bleyben. Darumb geet der spruch Esaie nit weiter dan auff Christum / wie auch die propheten all sagen / das darnach werd kōmen ain künigreich so weit alls die ganze welt ist / Malachie am. i. Wellicher wolt mir ain thür auffthūn vmb sonst? vom auffgang biß zū dem nidergang der Sonnen ist mein nam groß / vnd ich hab ain opffer in d gangen welt / dann groß ist mein nam vñ den Haiden. Hie redt der prophet von dem gaystlichen reych Christi / der ihm ain betthaūß bauen wurd alls weit die welt wer.

Es ist war / dz Got den tempel zū Jerusalem selbs bestetiger hat / das er hailig wz / nit darumb das er schön stain vil kösslicher gebew heit / od das er geweicht war von bischoffen



wie man yetzund mit narrey vnn d solchem kachelwerck vmb  
geet / sonder Got het in mit seinem wort geweicht vnd gehai-  
liget / da er sprach / Dis hauß / ist mein hauß / dann sein wort  
ward darin geprediget / Wa Gottes wort geprediget wirt /  
da ist sein recht hauß / wa das wort geet / da wonet gewislich  
Got mit seinen gnaden / Wa sein Euangelium ist / da ist ain  
betthaus / da sol vnd mag man recht betten / vnn Got wil es  
auch erhören / wie er sagt Johan. xvi. So ir den vatter vmb  
etwas bitten werdet in meinem namen / so würt ers eüch ge-  
ben / Bis her habt ir nichts gebeten in meinem namen / Bie-  
tet / so werdt ir nemen ꝛc. Herwyderumb / wa das wort nicht  
ist / da ist der teüffel gar mit ainander.

Das wirs den Juden nach gethon haben / vnn so vil kirche  
gebawt / das gieng wolhin / wañ wirs darumb gethon hett-  
en / das das wort Gottes darin geprediget wurd / dan wa dz  
wort geet / da ist Gott gegenwertig / sieht von himel herab /  
vnn geüßt da sein gnad auß / Von des wegen sagt er / Ich wil  
nit / das ir auß meinem hauß ain mordgrüb machen / dan es  
waren welchler darin / sie verkauften schaff / vnn oxen / da  
mit es die frembden kauften zu opffer / vnn zu Gotes dienst.  
Warumb haist ers dan ain mordgrüb? Er gibt im ain schet-  
lichen namen. Es was aber darumb zu thun / Sie hielten dz  
hauß nicht mer für Gottes / sonder für ain iarmarck hauß /  
das ist / die priester fragten nit dar nach wie das wort Gott-  
es darin geprediget wurd / wie wol sie sangen / plerten / vnn  
lassen propheten vnn Wosen / aber Gott acht solch murmeln  
der psalmen nit / es gehört für die kinder.

Sie haben gleich gethon wie vnser epfaffen / die haben auch  
auß den kirchen vnn klöstern mordgrüb gemacht / haben  
giffte geprediget / vnn im grund allain darumb meß gehalten /  
das man in gelt vnn presentz gebe / das sie den bauch füllen /  
haben also ain kauffhaus gemacht / darin sie iren thant auß-  
richten / vnn die schaff verderben / vnn erwürgen mit iren le-  
ren. Das haist ain mordgrüb der selen. Man solt auch disen  
Tittel an all kirchen schreiben / darin das Euangelium nicht  
gepredigt



gepredigt wirt/dan da spotten sie Gottes / erwürgen die se-  
len / treibē das recht wort auß / vñ richten ain morderey an/  
dan wer ir wort hört / der muß sterbē / O wie seind wir so schet-  
lich versittet worden. Aber nun sollen wir Got loben / das vns  
das wort das leben widerbringt / die mörder vertreibt / vñd  
leret vns recht betten / dan ain rechtgschaffen hertz muß bet-  
ten nit mit dem mund / sonder mit dem hertzen.

## Beschluß.

Also haben wir das ander stück im Euangelio wie Chri-  
stus die verkäufer / das ist / die bauchknecht heraus treybt /  
vñd macht seinem wort raum. Es wer güt / das man die klö-  
ster auch also aufsetzte / vñd machte schülen oder predigklö-  
ster darauf. Wa das nit geschicht / so seynd vñd bleyben es  
mordgrübē / Da ist Christus sein eygē hauß ain mordergrüb /  
wie vil meer wurden vnser temple / die Gott nicht geweycht  
hatt / mordergrüben gescholten werden?

Ich hab euch oft gebetten / das ir Gott solten bitten / das  
er seinen zorn abwenden / vñd dem teüffel weren wolt / der jet-  
zund in der welt ist / dann ir habt wol gehört den grossen jom-  
mer / wie ir vil erschlagen seind / ist zū besorgen / sie seien all ver-  
loren / dan Got wil gehorsam haben / vñd hat das vñtail selbs  
men / wer das schwert nimpt / sol durch das schwert vmbko-  
gefelt der / teüffel hat sie besessen / wer waist / wann es an vns  
wirt sein. Darumb laßt vns Got bitten / Das vnns sein reich  
zūkomme / die Christen sich meeren / vñd das er klüg vñd  
vernünfftig prediger schicke / die das volck annem vñd ir  
gehörche. Wer die gab Gottes erkent / der bitt für  
die andern / die das wort noch nicht gehört hab-  
en / es ist hohe zeit. Sprechet

ain Pater  
noster.

b iii auff das



Auff das vier vñz wainzigst Capitel  
Matthei von des Jüdischen reychs vñnd  
der welt ende. Geprediget am letstē  
Sonntag nach Pfingstenn  
durch Mar. Luth.



An ir nu sehen werdet den wüsten gre-  
wel / darvon gesagt ist durch den Pro-  
pheten Daniel / daz er steet an der hay-  
ligen statt / wer das list der merck da-  
rauff Als dan fliehe auff die Berg wer  
im Jüdischen land ist / vñd wer auff dem dach ist der  
steig nit herab etwas auß seinem hauf zů holen / vñ  
wer vff dem feld ist der ker nit vñ seine klaiden zů ho-  
len. Wee aber den sch wägern vñ sengeren zů der zeit.  
Bittet aber dz ewer flucht nit geschech im wintter  
od am Sabbath / dan es wirt dan ain grosse trübsal  
sein / als nit gewesen ist vom anfang d welt bis her /  
vñd als auch nit werden wirt / Vñd wa dise tag nit  
wurdē verkürtzt / so wurd kain mēsch selig / aber vñ  
der außervölten willen werden die tag verkürtzt.

So dan jemāt zů euch sagē wirt / sich hie ist Chri-  
stus oder da / so solt irs nitt glauben / dan es werden  
falsche Christi vñd falsche Propheten auffstēen / vñd  
grosse zaichen vñd wunder thūn / dz versürt werdē  
inn irthum / wa es müglich wer / auch die außervöl-  
ten. Sich ich habs euch zů vor gesagt / daruñ wan  
sie zů euch



sie zu euch sagen werden. Sich er ist in der wüsten/  
so geet nit hinauf. Sich er ist in d kamer /so glaubt  
nicht. Dann gleich wie der plitz auf geet vom auff-  
gang vñ scheint bis zum nidergang /also wirt auch  
sein die zukunfft des menschen suns. Wa aber ain aß  
ist /da samlenn sich die adler.

**I**n diesem Capitel /ist beschriben der außgang vñnd  
das end baider reich / des Judenthums vñd auch  
der gangen welt. Aber die zwey Euangelisten Mat-  
theus vñnd Marcus werffen die beyde in ainan-  
der /halten nit die ordnung / die Lucas gehalten  
hat /Dañ si nit weiter sehen / daß das sie die wort Christi ge-  
ben vñnd verzelen / bekümmern sich nit damit /was vor oder  
nach geredt sey / Lucas aber befließt sichs klerlicher vñnd or-  
denlicher zu schreiben /vñnd erzelet dise red zwey mal /ainist  
kürzlich am. 19. Capitel /da er allain von zerstörung der Ju-  
den zu Jerusalem sagt / Darnach am. 21. von disen beyden  
nach ainander.

So wisse nun das Mattheus /hie in ainander wirckelt vñd  
zu gleich fasset das end /baide des Jüdischen volcks vñd der  
welt /kocht es also in ainen brey / Wiltu es aber verstee /so  
mußt u es außsündern vñd jeglichs außsein end ziehen /wel-  
ches aygentlich von Juden /oder der gangen welt geredt sey.  
Das wollen wir sehen.

Erstlich facht Christus in diesem Capitel an zu weiffagen  
von des Jüdischen reichs endlichen zerstörung /welcher die  
Juden gar nit glaubten noch sich versahen /Dañ das volck  
durch trefflich grosse zaichen vñd wort oder zusagung Gott  
es /so er den lieben vättern beweyset vñd thon het /eingesetzt  
war /des gleichen nie k ainem volck auff erdē widerfaren wz /  
Der halben sie gang steiff stünden vñnd sich dar auff verlief-  
sen /hielten darfür /sie wurden ewig bleiben /wie sie auch noch  
heutigs tags



heutigs tags mainē/ir reich sey nit zerstört/sonder ain wenig  
gefallen/vnd solle noch wider auffgerichtet werden /können  
auß dem sinn nit treten/dases gar mit ihm auß sey.

Darū hat nun Got zuuor/nebendē wundern/auch durch  
klare/hälle/sprüch der Propheten verkündigen lassen/das  
diß reich ain end solt haben/vnd Got auffheben wolt dz eüs-  
serlich regiment im gefas /speißopffer 2c.vnd ain anders  
einsetzen/das da ewig werete/wie der Engel sagt Luce. 1. zu  
der Junckfrawē von Christo /Er wirt ain künig sein/über  
das hauß Jacob/vnd seines künigreichs wirt kein end sein.

Vnder den selbigen sprüchen von des Judenthums end/  
ist fürnemlich ainer/den Christus hie einfürt/des Prophetē  
Daniel. ix. vom dem wüsten gewel der da steet/wa er niche  
steen soll/dann er eben vom Jüdischen volck geredt ist/vnd  
spricht daselbst also/Werck vnd vernimb/von dem an wā  
die red außgeet/das Jerusalem wider soll gebawet werden/  
seind sibenn wochen vnd zwü vnd sechzig wochen (das seind  
zu hauffen. 70. wochen /vnd machen. 490. jar) vnd über zwü  
vnd sechzig wochen/wirt man den Messiah außrotten/vnd  
die werden nit sein seynn. Die stat aber vnd das hailige/wirt  
verderben das volck des fürsten der kōmen wirt/vnd sie wirt  
mit vngestüm ir end nemen/vnd wā der streyt ain end hat/  
wirt da bleibenn ain gewisse verwüstung. Er wirt aber den  
bund bestetigen vnder vilen in ainer wochen/vñ in der helffe  
der wochen wirt auffhören opffer vnd speißopffer/vnd wirt  
im tempel sein ain wüster gewel/vnd die verwüstung wirt  
biß an das end werenn.

Der Prophet Daniel het gern ain gewisse zeyt gewüßt/  
wann das geschehen wurde/kund es aber nit erlangen. Dā  
wiewol der Engel ain bestimbte zeyt deütet /was es doch zu  
fünfter das der Prophet nit verstee kund /Darumb er auch  
zuuor sagt/ Aufß leist /oder zur letzten zeyt/wirstu das alles  
sehen/das ist/deine prophecey die dir offenbart wirt/soll am  
end der welt angeenn.

Dā da Christus dz Euangelion ließ angeen/durch sich  
vnd die



vñ die Aposteln / hat es gewert drey oder vierdhalb iar / dyes  
fast an die rechnung Danielis kombt (nemlich. 490. iar) dar  
umb er auch sagt / Christus soll ain halbe woch nemenn / inn  
der solle das täglich opffer auffhören / das ist / der Judenn  
priesterthumb vñd regiment soll ain end haben / wellichs al  
les geschehen ist die vierdhalb iar da Christus predigt hatt /  
vñd fast in vier iaren nach Christo verändert / inn wellichen  
das Euangelion am aller stercksten gangen ist / sonderlich  
im Jüdischenland / durch die Apostel / daz / wann sy iren müd  
auffthetten / der haylig gaist bald von hymel fiel / wie man  
inder Apostel geschicht sihet / das also ain ganngewoch / das  
ist / sibem iar der bundt (wie Daniel sagt) bestettigt / das ist /  
das Euangelion den Juden gepredigt ist / dauon anders  
wa geschriben. Da nun die zeyt da war / vñd ain newe predig  
angyeng / müste auch ain newe reych angeen / das ist / darin  
Christus durch wort vñd glauben gaystlich regiert in vnsern  
herzen. Solc das nun fort geen / so müste ihenes vñlaubtrie  
gen / nicht meer gelten vñd auffhören. Das ist der prophetenn  
weyßsagung ain stuck / darauff Christus deutet.

Das ander ist von dem wüsten greuel / daspricht nun Chri  
stus / Wann ir den selben im tempel steen sehen werdet / dan  
sehet darauff (will er sagen) dann das soll ain gewis zaychen  
sein auß der prophecey Danielis / das diß reych nun ain end  
habe / vñd lasset euch nicht ir machen / das die Juden oder  
auch schwache Christen mainen / es soll nicht verwüst werde.

Der greuel aber dauon Daniel schreibt / ist das der Kay  
ser Caius (wie die historien anzaygen) seyn bild in tempel zu  
Hierusalem setzet für ainen Abgot / das sie es solten anbeten /  
nach dem alles / was da war / zerstöret war / Dann die schrift  
hayset die Abgötter aygentlich ain greuel / darum das got  
darfür eckelt vñd grawet / dann er kainer siind so seer seynd  
ist / als diser / Die andern strafft er wol / wyrfft aber darumb  
die leut nicht hynweg / wie Psalm. 89. sagt / So seyne kinder  
meyn gesatz verlasszen / so sie meyne sitten enthayligen / vñd  
mein gebot nicht halten / so wil ich ir übertretung mit der rü

c ten haym



ten haymsüchen/vnd mit plagen ire missethat/Alber meyne  
güte will ich nicht von im thun/vnd meynen glaubenn nicht  
lassenn fälenn.

Alber dise sünd so da haysset Abgötterey/vrind aygentlich  
ist vnglaube/vnd verlaugnung Gottes/kan er gar nicht ley-  
den/verdamnet den menschen gar/Dann wa das im hertzen  
belybt/das es recht leeret vñglaubet/waist das vnserer werck  
nichts seynd/vnd wir allayn durch den glauben Gott ange-  
nem werden/vnnd im recht dienen/so ist da ain recht Goisc-  
lig wesen/da bleybt liecht vnd warhayt/Ob gleych da neben  
dem glaubenn mitlaufft sünd/schwachayt des flayschs/ist  
nicht ain grewel vor Gott/sonder nur ain tegliche/die Gott  
zeitlich straffet/behelt doch daz volck/schonet vnd vergibt sie/  
darumb das die leütt seyn güte erkennen lernenn. Dar ge-  
gen wa der glaub vnnd rechteleere nicht ist/da ist alles ver-  
loren/dann es nicht möglich ist/das der mensch im nicht ain  
falschen Gottes dienst auffrichte/vnnd seyn aygenn dunckel  
vnd werck von im erwölet anbettet/damit er aygentlich got  
vnnd seyn wort verlaugnet/dan on Gott gang abgewendete  
würt/daz kaysn gnad da seyn kann. Sollicher greüwel ist ge-  
manygklich der schönesten vnnd grösssten hayligen vor der  
welt leben/die außwendig in schönen wercken vnd geberden  
her treten/inwendig aber voll vnflats sein/wie wir biß auff  
den heuttigen tag sehen/in vnseren orden vnd Gottes dien-  
sten/wa sie am besten seynd. So doch widerumb etliche Chri-  
sten seynd/die ihenen in iren wercken vnnd wesen nicht gleich  
scheinen/doch vor Gott haylig seind.

Spricht nun Christus/wie gesagt/wann der grewel/das  
ist/der Abgot/in dem tempel steen würt/so würt das reich  
endlich verwüstet vnnd zerstöret werden/das hernach kaysn  
bawen meer seyn würt/Das trucket Lucas klärlich auß mit  
disen Worten/Wann ir aber sehen werdet/Hierusalem belegt  
mit ainem heer/somerckt das herbey kommen ist ir verwü-  
stung.Vnd volgt so bald darauff/das er auch hiesagt/Ala  
dā flyehe auff die berg/wer im Jüdischen land ist ic. Item  
wee aber



wee aber den schwangern vnd söugern zu der zeyt. Vnd betet aber das eüwere flucht nicht geschehe im wintter oder am Sabbath/dann es würt denn grosse trübsal seyn/allis nie gewesen ist/noch werden würt.

Das gehört noch alles zum Jüdischen volck / Dann sollte das über vns geen am end der welt/so müßten wir/ laut des texts/im Jüdischen land seyn/weyl er es aygentlich darauff deutet. So ist auch war/das er sagt/das kein grösser blag auff erden kommen sey noch kommen werde / allis in der zerstörung gewesen ist/allis man in den historien sehen kan / wie jömerlich sie vmbbracht seynd/vnnd sich auch vnder ainander selbs vmbbracht haben/selbs ins feur gesprungen seind/vnnd ainer den andern gehayssen hatt sich erwürgen/ Ja auch der hunger so groß war / das sie die adern von armbrust bogen frassen/darzu auch ir aygne kinder. Ist so schendlich vnnd greulich zu gangen/das solcher jomer vnd ellend nie mer gehört ist/Sye wolten auch selbs haben/das sie Got so verblendet vnd verderben ließ / Er hette sich ir wol erbarmet vnd sie gerne erhaben/so brachten sie sich zu sollichem jomer mit irem harten kopff/das sie sich selbs müsten erwürgen vnd verzere/das wie sie es angryffen alles sollichen mord vnd blutnergießen stercken müste.

Also ist der tod Christi vnnd aller Prophten an in greulich genüg gerochen/darumb das sie onn auff hören wider Gottes wort tobeten / vnnd darzu die Apostel verfolgten vnnd veriagten/wie Paulus sagt. 1. Thessalo. 2. Der zorn ist schon endlich über sie kommen.

Wann nun solcher schrecklicher zorn vnd greüwliche plag vorhanden ist (sagt Christus) so fliehet wa hin ir nun fliehe kündet. Dañ dise wort/ So fliehe auff die berge wer im Jüdischen land ist/vnnd wer auff dem tach ist. Item/Wer auff dem feld ist ꝛc. seynd alle auff sprüchwords weyse geredt/das so vil gesagt sey / Wachtet euch eylendt daruon je er je besser vnnd lassett euch nicht finden. Das geschach auch also. Da die Juden /genüg durch vil zaychen gewarnet waren /das  
das sie c ij



das sie sich vnder die Römer geben soltten / vnd sie nicht wol-  
ten. Da lyessen die Junger vnd Apostel darvon / vnd folg-  
ten dysen spruch Christi / lyessen alles steen vnd ligen was  
im Jüdischen land was / keerten auch nicht widerumb et-  
was zu holen.

Sehet aber (spricht er weytter) das eüwere flucht nicht ge-  
schehe im Winter oder am Sabbath / das ist / sehet das ir zur  
rechten zeyt flychet / das ir nicht ergriffen werdet. Dann er  
wolt kayn wunder thün / das er sie mitten vnder den feynden  
allayn erhielt / wie wol ers hett künden thün. Dañ er beschloß  
sen hett / das er alles was da war / in ainen hauffen wolt ba-  
chen / Darumb hatt es eytel verlornen hauffe müssen sein. Ist  
ain grosse welt da zu Hierusalem gewesen / wie man schreybe  
bey aylffmal hundert tausent man / dz in ainander geschmol-  
gen seynd so vil ir da was. Darumb warnet Christus seyne  
junger / das sie ire flucht nicht sparen auff ain Sabbath / dar-  
an man nicht wandeln thürste / noch in wintter / da es zu kalt  
ist / sonder sich dauon machen je eer je besser / das wa sie verzu-  
gen / nicht ain vngelegne zeyt zu fliehen káme.

So ferre hat nun Christus von den Juden geredt. Nun  
hab ich zuuor gesagt / das Matheus vnd Marcus die zway-  
end in ainander mengen / darumb es hie schwer ist zu vnder-  
schayden / vnd müssen doch vnderschayden. Darumb mer-  
ck das was bißher geredt ist / alles dorthyn auff die Juden  
get / aber hie flichtet ers nun baydes in ainander / bricht aber  
kurgabe / fragt nicht vil nach der ordnung / wie die sprüche /  
so Christus gesagt hat / auff vnd nach ainander geen / son-  
der lasset es dem Euangelisten Lucas befolhen seyn / wyll  
aber so sagen / das es vor dem jungsten tag auch so geen wer-  
de / vnd spricht.

Vnd wa dise tag nicht verkürzt wurde / wird  
kayn mensch sálig / aber vmb der aufer-  
wölten willen werden sie verkürzt.

das ge-



Das gehört auff beyde taylor vnd ist die maynung/ Der  
jomer soll nicht lang weren umb der fromen willen/ Wann  
es auch nicht zway gannze iare geweret hatt/ das wider frid  
wordē ist. Weyl aber das alles auch auff s end der welt geet/  
wollen wir die vorige sprüche von den Juden von vorn her/  
auff vnß ziehen/ das wir dem Euangelisten genüg thun.

Das ain solliche schlacht mer kommen solle/ wie über die  
Juden gangen ist / versihe ich mich nicht / weyl der text  
spricht/ Es werde solliche trübsal seyn/ als nicht mer werden  
würdt/ als man auch lißet vnd sihet/ Aber vnß würdt ain an-  
dere straff widerfaren/ wie ihene leyplich gewesen ist/ so wirt  
am ende ain gaystliche geen über die vnchristen/ die gleich  
seynd wie die Juden. Also wirt sichs mit ainander verglei-  
chen/ wie ihene plag durch Gotes ordnūg zū Hierusalē kam  
vnd alles zū puluer machet/ So greulich/ ja noch greülicher  
würts auch vorn jungsten tag geen/ wann er kommen wirt  
vnd der ganzen welt ain ende machen.

Dan als Christus gen hymel gefaren ist/ hat er sein reich  
nicht allain im Jüdischen land gespannet/ sonder in die gan-  
ge welt durchs Euangelion außgebra ytet/ welliches überal  
gepredigt vnd gehört ist. Wir thünd aber ebenn wie die Ju-  
den/ verlaugnen vnd verfolgen Gotes wort/ vnd tödten die  
Christen/ so das selb bekennen vnd predigen/ wie erstlich die  
Römer vnd hernach biß auff disen tag/ Papst/ Bischoff/  
Fürstē/ Mönch/ Pfaffen. Weliches nun über fünff hundert  
jar her triben ist/ das nyemand Gotes wort hat thüren pre-  
digen/ onn das sie auff der Canngel zūm schein den text des  
Euangelij haben her vertzelet / vnd darnach menschen lere  
darauf gesogen/ oder hineyn gebracht/ Was sich jemand dar-  
wider hat geregt/ seynds mit schwerdt vnd feür da gewesen/  
vnd das selb geteübt. Hilfft auch noch nicht wie man sie war-  
net vnd schrecket mit Worten vnd zaychen/ fergenn den kopff  
auff schreyen vnd tobenn dawider/ als die vn synnigen. Das  
ye Gott vsach gnüg habe/ sye mit dem jungsten tag endtlich  
vnd ewiglich zū verderbenn.



Darumb gehört der spruch Danielis vns auch zu / vor dem  
grewel. Dann wir auch ain rechten wüsten greweel haben in  
ainer hayligen stadt sitzen / nämlich in der Christenhayt vnd  
der menschen gewissen / da Got allayn sitzen vnd regiren solt /  
Daruon Daniel mit klaren außgetruckten Worten vil schreibt  
am achten / Item am aylfften Capittel. Dann das ist die rech-  
te rayne lere / so wir predigen / das wir durch Christum erlö-  
set werden von sünd / tode / teuffel vnd allem vnglück vnnnd in  
Gottes reich gesetzt / durch das wort vnnnd den glauben / dar-  
mitt von allen gesagen frey gemacht / vnnnd das Eayn mensch  
durch deß gesangs werck / wie sie hayssen mügen / zu dem reich  
komme / noch der sünd loß werde. Wa solichs geprediget vnd  
gelaube würdt / da wonet Christus vnnnd regieret im hertzen  
gaystlich on mittel / da ist der haylig gayst mit allen gütern  
vnd fülle deß reichthumb Gottes.

Wie thüt aber der Papst? Er sitzt nicht im leyplichenn  
tempel oder Gottes hauß / sonnder in dem gaystlichen newen  
vnnnd lebendigen / daruon Paulus sagt. 1. Corintbio. 7. So je-  
mandt den tempel Gottes schendet / den würt Got schenden /  
dann der tempel Gottes ist haylig / der seyt ihr. In welchen  
sich alle zeyt vil teufel vnnnd Ertzer vnderstannenden haben zuse-  
hen / vnd alle die so predigen wider die rechten leere. Wilt du  
selig werden / so nimb disen oder ihenen stand vnnnd orden an /  
thü das oder diß werck. Ziehen die leut also herauß vom ge-  
lauben auff die werck / füren doch daneben die wort / Christ  
sey der Herr / im grund aber verlaugnen sie zu / dann sie Eayn  
wort daruon sagen / das er allayn auß gnaden die sünd verge-  
be / von tod vnd helle erlöse / sonnder also / durch dysen orden /  
durch solche werck müß man sünd büßen / darfür gnüg thün  
vnd gnad erlangen. Welchs eben so vil ist / als sagtestu / Chri-  
stus hatt es nicht thon / ist nicht der hayland / sein leyden vnd  
tod künden nichts helffen. Dann soll es dein werck thun  
so kan ers durch sein blüt vnd tod nicht thün / Es müß jeder  
zway ains vergebens seyn / beleybest du auff den wercken / so  
creybst du Christum auß / verlangtest vnnnd schendest seyn  
theures blüt



teüres blüt vnn̄d in gar mit ainander / so kan er nicht durch  
seyn wort / werck vnd gayst im hertzen sitzen vnd regiren / son  
der mein werck ist mein götze / den lass ich sitzen vnn̄d regier  
enn.

So sihe nun ob nicht der Papst der höheste erzgrewel al  
ler gewel ist / den Christus vnd Daniel maynet / vnd der rech  
te Endchrist dauongeschriben ist / das er sitze im tempel got  
tes / inn dem volck / da Christus genennet ist / da seyn reich /  
gayst / tauffe / wort vnd glaube seyn soll. Weyl er durch seyn  
geschwürm des gaystlichen rechts Christo in seyn ambt vnd  
reich greyfft / will über die gewissen herrschen vnd mit seynen  
auffsetzen vnd wercken regieren / vnd hayset wol ain wüster  
grewel / das ist / der nur alles zerstöret vnn̄d verwüset. Dann  
wie gesagt ist / Es kann nicht bey ainander bleyben / Christus  
vnd mein werck / steet ains so muß das ander vndergön vnd  
zerstört werden. Darumb hat der Papst Christus reich gar  
verwüset / so weyt seyn sprengel raychet / vnn̄d die vnder ym  
seyn / haben alle Christum verlaugnet.

Das hat alles S. Paulus von im geweyssagt. 2. Thessa. 2.  
da er in hayset ain menschen der sünd vñ das kind der verder  
bung / der da ist ain widerwertiger vnd sich überhebt über al  
les das Got oder Gottes dienst hayset / also das er sich setzet  
inden tempel gottes als ain Got / vnd gibt sich für er sey got.

Das aber die Papisten disen spruch von sich wenden wöl  
len vnd sage / Christus vnd Paulus rede vom tempel zu Hie  
rusalem / das der Endchrist da selbst sitzen vnd regieren werd /  
gilt nichts. Dann Christus hie sagt / das Hierusalem sambe  
dem temgel ain ende haben vnn̄d nach der zerstörung nymer  
gebawet werden sollen. Darumb weyl Paulus auff die zeyt  
nach des Jüdischen reichs vnd leyplichs tempels zerstörung  
deutet / kan es nicht dann vom gaystlichen tempell verstan  
den werden / welcher (wie er selbs sagt) seind wir.

Da soll der Papst sitzen vnn̄d geeret werden nicht über  
Got / sonder über alles das da Got hayset (spricht er) dann  
Gottes



Gottes namen bleybt natürlich die höchste eere / darumb kan  
er sich über den rechten natürlichen Got nicht setzen / sonnder  
über das / das Got hayset / das ist / über sein predig vnd ere.  
Gottes eere vnd dienst wirt er haben / höher / dann der rechte  
schaffne Gott / wie vor augen ist / das alle Fürsten vnnnd die  
welt an im hangen / vnd seyn gesatz höher vnd mer dann got  
tes gebot halten. Wann jemand wider seyn gebot flaysch is-  
set / oder auß dem vnraynen pfaffen / Mönche vnd Tinnen  
stand sich in ain Elich leben gibt / wie Got geboten hat / oder  
nach Christus ordnung / das Sacrament inn beyder gestalt  
nymbt / ist die größte sünd / Das vil geringer seynd / stelen / ee-  
brechen vnd alle offentliche laster wider Gottes gebot / vnnnd  
sie auch niemant darum straffen thar / Ja dz sie selbs Gotes  
wort lesteren / die Christen verfolgen vnd vmbbringen / achten  
sie für den höchsten Gottes dienst / wie es auch der höchste  
dienst ist / so sie irem Got dem Papst thün künden. Hayset  
das nicht den Endchrist recht über Got gesetzt vnd geeret.  
Also / das / wer darwider redet oder thut / wann er in ir hend  
kombt / so bald sterben muß. Ich mayn ye es sey gnüg den  
greüwel abgemalt vnd außgestrichen.

Hie ist nun hohe zeyt das da lauffe vnd fliehe / wer da flie-  
hen kan / lasse steen vnd ligen was er hat / vnd mache sich dar  
von / je ee ye besser / nicht mit füßen / sonder mit dem herten /  
also / das man des greuwels loß werd / vnnnd durch den glau-  
ben in Christus reich trette. Es gehört aber ain verstand vnd  
scharpffe gesicht darzu / das man den greuwel recht erkenne.  
Ist aber nicht bas zu sehen / dann wann mans gegen Christu  
helt / der leeret / wie oben gesagt / das wir durch seyn blüt mit  
Gott versünet vnd selig werden. Der Papst aber gibt  
solliche krafft vnsern wercken. So syhest du ye / das wider  
ainander ist / durch werck selig werden / vñ nicht durch werck.  
Wilt du nun bey Christo beleyben / müßt du den Papst flye  
hen vnnnd faren lassen.

Diß ist nun der wüste greuwel / der zu vnser zeyt regieret  
hat / aber nun von Gottes gnaden offenbart ist / würdt aber  
nicht



nicht durch Kayser oder weltliche gewalt zerstört werden /  
Es muß all: s höher dann ihene leypliche zerstörung seyn /  
da doch so groß trübsal gewesen ist / das Kayn größere seyn  
mag leyplich. Darumb hat im Got allayn disen greuel vor  
behalten zu vertilgen / wie Paulus sagt / wellichen der Herr  
erwürgen würt mit dem gayst seynes munds / vnd würt sein  
ain end machen / durch die erscheynung seiner zukunfft / wie  
wol sie sich übel fürchten vor weltlicher gewalt vnd auffrür.

Es soll ihn aber nicht so gut werden / dann sie sollicher lin-  
der straffe nicht werdt seind / vnd ihn Got nicht günnet / das  
sie durch menschen zerstört werden / sonnder wil es selbs on  
mittel thun / durch seyn wort / wie es dann nun angangen /  
vnd das reych je so verzerstört ist / das es nicht meer gilt /  
noch die gewysen sacht / deren / so das Euangelion wyssen /  
wie feyndlich der Papsst wider das Euangelion strebedt /  
muß er dannoht den Fürsten zu füßen fallen hilff suchen.

So ist ja seyn macht durchs Euangelion geschwehede  
vnd gebrochen / aber seyn endliche zerstörung würt auff  
den Jüngsten tag behaltenn. Darumb muß es noch zum  
tayl bleyben / so lang bis Christus mit seynen zukunfft al-  
les in ainen hauffen verdilgte / vnd zu buluer mache von hy-  
mel herab.

Aber wie ihenes mal bey den Juden die tag verkürzt seind  
worden / als Christus sagt / so müssen sie yetz auch verkürzt  
werden / vmb der außerwelten willen. Wie wir sehen das des  
Papsst regiment bey hundert jaren her jmer widerstand ge-  
habt hatt vnd abgenomen / on das in dem Concilio zu Co-  
stantz / da Johannes Huss verbrandt ward / er yedermans schre-  
cket / das man ihn für Got hielt / die warhayt aber kam doch  
bald herfür / bis iez her / da es nun gar veracht ist / vnd nicht  
lang meer steen kan. So geet nun diß / wie gesagt / nicht  
allayn auff die Juden / sonder auch auff vnsern greuel des  
Papssts reych.

Spricht nun Christus weyter.

¶ Sodan



So dann iemand zu euch sagen würdt/sihe hye  
ist Christus oder da/so solt irs nicht  
glauben.

Die folgende spruch solt mann wol wyssen vnnnd fassen/  
den Papst vnd seyn rodt damit für den kopff zu stossen/wel  
liche das reych Christi herauß führen/vnnnd ain Christlich le-  
ben binden ann eüsserlich sichtlich ding/wie sie dan öffentlich  
sagen/Wa der Papst ist/da ist die Christlich Kirch/da mit sie  
vns dahin führen wollen/das wir sie finden/sülen vnd greyff  
en sollen/an person/stedt vnd weyse/das alles eüsserlich ist/  
Also thünd all: Clöster vnnnd stifft. Wan du (sagen sie) disen  
stand annimbst/so issest/dich klaydest/so bettest/so fastest/so  
würst du deyn sünd büßen vnnnd sällig werdenn. Sollichs hat  
vnnß Christus hie seyn zuuor abgemalett/vnnnd ebenn auff  
alle Clöster/stende vnnnd werck gezilt/damit sie denn seelen  
wöllen heiffen/vnnnd warnett vnnß/das wir vnnß daruor  
hütten/vnd von dem grund/darauff wir steen/nicht lassenn  
reyssen/das wir durch der Eaines Christen werden/sonder al  
lain durch sein blüt von allem übel erlöset vn in sein reych ge-  
setzt werden/so wir glauben. Reysset vnnß damit alles zeyt  
lich eüsserlich ding auß denn augenn/stosset mit ainem wort  
darnider alle leere/so nicht den glauben rayn predigen/vnnnd  
alles leben/so nicht nach der rechtgschaffnen leere des glaubens  
gerichtet ist. So ist küniglich das er sagt/wan jemand sagt/  
hie oder da ist Christus/so glaubt nicht/so vil geredt/Hütet  
euch vor allem was euch auff werck füret/dannes treügt ge-  
wislich vnnnd reysset euch vonn mir.

Dann es werden falsche Christen vnd prophe-  
ten auffsteen/vnd grosse zaychen vnd wun-  
der thun/das verführet werden in den ir-  
thüm/waes möglich were/auch die  
außerwöltenn



Sik seind trefliche/ernstliche vnd gewolliche wort/das di-  
se werck prediger mit solchem schein vnd nachdruck solichs in  
die leut treyben sollen/das sich auch die hayligen/so im glau-  
ben steen/nicht darvor künden hüten/sonder auch mit irren  
müssen/wie auch geschehen ist. Dann die lieben vätter/Au-  
gustinus/Hieronimus/hoffe ich auch. Item sanct Bernhar-  
dus/Gregorius/Franciscus/Dominicus / vnd vil meer/  
wie wol sie haylig gewesen seind/ haben sie dannoch hie alle  
geirret/wie ich oft mal anderßwa beweyset habe.

Dann der irthumb ist zeytlich angangen/vnnd seynd mitt  
anndern auch dareyn geradrenn / das sie Christenlich wesen  
bunden an eusserlich ding/vnd so weit hineyn gefürt/das sy  
mit eusserlichem wandel selbs hineyn getredten seynd / Als  
man sihet in S. Bernhardus büchern / wie er übel schreybt/  
wann er yemandt antworten soll/wa er aber frey dahin auß  
seynem gaystschreybet/so seyn predigt das lust ist/Wie auch  
Augustinus/Hieronymus/Ciprianus dem grossen seynen  
marterer/vnd vilen widerfaren ist / Wann man ihn yrgent  
ain frag fürgelegt hat/vom gesatz oder eusserlicher ordnung/  
ob mans so oder so haltenn soll /seynd sie hynnach geblumpt  
vnd hineyn getretten/das nicht weyt gefälet hat/das sie ver-  
füret worden weren. Noch füren die Papisten das am aller  
stercksten wider vns. Solten so vil haylige leut vnnd lerer ge-  
irret habenn/sagen sie/vnnd Got die welt so verlassen haben?  
Sehen nicht / das sie diser spruch für den kopff stosset/das sie  
taumeln möchten.

Was soll man in nun antworten/der spruch ligt dürrer vnd  
klar da / den müssen wir glauben vnnd steenlassen / künden  
nicht darfür über/wann gleych die hayligen Engel im hym-  
mel dar gegenn weren /soll dann Christus nicht haylig seyn/  
vnd seyn wort nicht so vil gelten als ir wort? Dann er sagt ye-  
nicht von vilen oder vom gossen hauffen/herz omnes/sonn-  
der von dem klaynsten heüfflinn der auserwölten/das dye  
krauchlen sollen/so fer das sie schyer möchte verfüret werdē  
d ij vnnd waren



Vnd warnet vns das wir auch an den nicht hangen sollen/  
wan wir sehen das sie her auß auff eüsserlich ding fallen/Wa-  
ben sie dann nicht geirret/so muß Christus nicht warhafftig  
seyn als ers verkündet hat. Wann nun gleych alle hayligen  
her treten vnd hießen mich an Bapst glauben/will ichs  
dannocht nicht thun/sonder so sagen/Ob ir schon außserwö-  
let seyt/hatt dannocht Christus gesagt/es sollen so gewolliche  
färliche zeyt sein/das auch ir iren müßet/Darumb müssen  
wir allayn an der schrifft vnd Christus wort hangen/der  
sagt so/Er sey nicht hie noch da/wa er ist da soll ich seyn/Er  
will nicht sein wa meyn werck oder stand ist/Wer mich nun  
anders leret/der treügt mich. Darumb sage ich noch/das  
nicht gilt das sie auffwerffen/Die hayligen vätter vnd lerer  
habens so gehalten/so gelebt/darumb müssen wir auch so hal-  
ten vnd leben/Sonder das gilt/Christus hat so geleret vnd  
gehalten/darumb müssen wirs auch halten/Dan er mer gilt  
dann alle hayligen.

Sihe ich habß euch züvor gesagt/Darumb wan  
sie zü euch sagen werden/Sihe/er ist in der  
wüsten/so geet nicht hinauß/Sihe er  
ist in der kamer/so glaubt nicht.

Vürzeyt der hayligen vätter Anthonij vnd andern/zeyt-  
lich nach den Aposteln/ist schon der irthum auffgangen/da-  
von hie Christus sagt (wie wol Anthonius vil geweret) das  
alles in die wüsten lieff/bey viltausent hayligen/vnd gewan-  
ain solchen schein/das es hernach Hieronimus vnd Augusti-  
nus schier anbeteten nicht wyßten hoch gnüg zü breisen/Vnd  
wan mans beym liecht ansihet/so ist diser text gewaltig dar-  
wider/seind auch vnder den selben vil käger gewesen/vnd  
vil verdampt/Doch/ob gleych haylig leut darunder waren/  
die der verführung entrunnen seind/ist doch das exempel fär-  
lich vñ



lich vnd nicht fürzüragen. Als auch S. Franciscus ain hat-  
liger man was aber dem exempel vnd orden/so er auffgericht  
hat nicht zuuolgen ist/Sollichs hat aber niemand erkannt/  
auch vonden hayligen/so eyeff vnnnd mitt grossem scheyn ist  
es eyngerissen/das Christelich leben ist nicht gespannt auff  
die wüsten/sonder so.l frey daher geen/wie Christus vnd die  
Apostel gelebt haben/das man herfür trette/vnder die welt  
offentlich predige vnnnd vermane/das man die leutt zu Chri-  
sto bringe/Solauffen ihene von leutten in die wüste/wöllen  
nicht in der welt bleyben/da sie vil leyden müsten/erwöllen  
ihn ain aigen streng leben/wöllen damit höhere Christe sein  
dan andere. Wie auch die Clöster thünd/die Christus may-  
net mit den karnern.

Beschleuss nun Christus vnd spricht.

Dann gleych wie der blitz außgeet vom auffgang/  
vnnnd scheynet bis zum nidergang/also  
würt auch seyn die zukunfft des  
menschensohs.

Will so sagen. Glaube nun nicht/wann man euch Christu  
so hie oder dorthin bindet/vnnnd vom glauben auff werck für-  
ret. Ich warne euch/das irvom raynen glauben nicht fallet  
dann ir wysset nicht welliche stund ich kómen werde/wann  
sichs nyemand versihet/würd ich hereyn schlagen so behend  
als ain blitz am himel leuchtet/Wer dann am glauben nicht  
gehafftet hat/der würt verloren. Darumb sehet zu/das euch  
der tag nicht überfalle/bleibt wacker im glauben/das wa ir  
faul seyt vnd schlaffet/euch der teufel nicht dauon reysse.

Aber die wort seynd hie vnordig nach aynander gesetzt/  
Dann (wie gesagt) Mattheus die sprüche nur verzelet auff  
ainem hauffen/aber nicht ordent. Darumb reymet sich nicht  
so aygentlich auff dise wort/das da volgt.

Wa aber ain af ist/da sammeln sich die adler.  
d iij das ist




Das ist / Ir döfft nicht darnach fragen / wa diestatt sein  
würdt da Christus kōmen würdt. Ich sey wa ich wöll / so wer-  
den wir vns wolzusamen finden / wie mann spricht / Wa ain  
aß ist da samlen sich die Adler. Dann wie die Adler in Eayn  
ort abmalen wa sie hinfliegen wöllē / sonder wa ain aß ist /  
da siegen sie sich hin. Also werden sich die meinen wol zu mir  
siegen / wa ich bin / werden meyne außerswöltten auch seyn.  
Das ist der text vom end der Juden vnnnd der welt / darauff  
menger nun Mattheus die sprüch von den zaychen des  
Jüngsten tags / welliches alles Lucas klärlicher  
schreybt / das gehört auff ain annder zeit /  
vnnnd ist anderßwa genüg  
gehandelt. 1525.


Im. 15. Blat. In der ain vñ zwaynzigsten zeylen stat dahinden (selbs) seind  
zwo zeylen versetzt / sollend also auff ainand gen (selbs) gefelt / wer dz schwert  
nympt / soll durch das schwert vmbkōmen / der teufel hatt sie besessen &c.

Im eist übersehenn worden / in der oberenn zeyl des dritten blats / stat vor sol  
kon vnn.






























Das ist / Ir dörfft nicht darnach fragen / wa die statt sein  
würt da Christus kōmen würt. Ich sey wa ich wöll / so wer-

n spricht / Wa ain  
die Adler in Kayn  
der wa ain aß ist /  
neinen wol zu mir  
ßtten auch seyn.  
der welt / darauff  
den zaychen des  
s klärlicher  
der zeit /

ahinden (selbs) seind  
gefelt / wer d; schwert  
att sie besessen zc.

iten blats / stat vor sol

